

Aloch sera? Fosc no, ma ge vel ge creer!

La "burta neva" che con chest invern l portoi de Aloch no l va più inant à soscedà de gran reazioni de despiajer e delujon: l Comun va inant a chierir na soluzion, ence se no l'è sorì



L portoi de Aloch che rua tel zenter del pais a Poza.

Sport e turism - La "burta neva" che con chest invern l portoi de Aloch a Poza sera è ruèda en vea de la Madona d'aost, perentoria, pean via da Trail travers l giornalista Silvano Pioner e la è ressutèda de fata sui media locai e ence naziònei e sui social, soscedan na gran reazion de despiajer, delujon, vèlch outa ence ira. Segn evident che Aloch, per la jent e per i imprenditores turistiche fasscgn, per i sportives e per i ghesé, l'è trop de più che l numer de "bip" che l ge porta a la sozietà Bufaure.

L'è stat apontin l president de la Bufaure, Cristian Lorenz, a confermèr te l'intervista l'intenzion de la sozietà de no jir inant, ajache se è rué al control di 30 egn e fossa besegn de investimenc che la Bufaure no pel e no vel tor sù, per n impiant che no desc'ùto. Nì da nef, chesta l'è na posizion cognosciuda da egn. Ma endèna l'empegn per no manèr en èschies

egn de esperienza tecnica e organisativa, contac e raporc sportives a auc livie, visibilità e promozion turistica, l va inant. L portoi de Aloch l'è stat l pont de referiment per n eserzìt de picoi e joegn sportives fasscgn, con pontes de diamant desche Angelo Weiss, Stefano Gross o Chiara Costazza, e no l revèrda demò la Bufaure, eneben che la sozietà s'è la patrona: l'è chi che se desc' jù con forza per chierir de portèr a compiment l projet per ge dèr n davegnir a chest gran patrimoni e na oportunità a noscia val. De Aloch l'era stat descoret ence en jebia passèda te Consei de Comun de Poza, canche l'è stat ratificà na variazion de bilanz de circa 13.000 euro per na encòria data sù da la Jonta tel meis de messèl per n studie de fatibilità per l'svilup e la valorisazion del Ski Stadium.

Chest studie, lurà fora da n grop de profesionisc coordiné da l'enjegner Mario Pedrotti, à metù

jù na previzion de intervenc e cosé - che cogn esser perfezionèda per i 22 de chest meis - per refer da nef l'impiant e slongèr l portoi en aut, acioche Aloch posse aer la carateristiches adatèdes per n Ski Stadium de valuta internaziònela, vardan en particulèr ai mondèi juniores del 2019, jà pervèduti te Fascia. En dut l'è stat calcolà che ge volessa passa 6 milions de euro, e chest senza conscidrer gregn intervenc per n parterre da tant.

Per chest projet l'è stat deliberà n finanziament public de 4.200.000 euro, che vegn en pèrt dal CONI e en pèrt da la Provincia de Trent: donca amò amancol n terz del cost, segur passa 2 milions de euro, i cognessa vegnir touc sù sul teritorie. Etnes finanziemenc sun desche endèna l'è chi del BIM, che l'è jà deliberà per chest intervent n contribut de 250.000 euro te 5 egn. Se sàben che dac chisc finanziemenc, se l projet no aessa da vegnir portà a compiment, no i podessa vegnir duré per vèlch auter intervent sui impiant o per la gestion, ma i fossa perdui per Fascia e i jissa utrò.

Apede a chisc, a livel amministrativ, podessa esser a la leta finanziemenc sul budget del Fondo Strategich Teritorièl de la Provincia, che a la fin de messèl fà deliberà la spartizion anter Comuns e Comunitàdes del Trentin de circa 115 milions de euro, e de chisc presciapèch 4 milions te Fascia, da destinèr a intervenc soracomunèi aldò de cordanzes de program e prozesc partezipatives anter la amministrazioni.

Per chel che vèrda l'investiment, somea che la sozietà Bufaure e l Consorzio di impiant portamont

de val abie de autra prioritèdes e no l'entene tor pèrt: se l projet jissa en port, la Bufaure fossa desponibola a fèr sia pèrt te la gestion, ma senza più esser patrona, e l Consorzio se impegnassa a corir l'eventuel passif de gestion enscin a na soma de circa 150.000 euro a l'an. Per chel che vèrda l bilanz, l'è da dir ampò ence che jà acà doi egn la Provincia, per enteressament del conseier Detomas, se à impegnà a corir l desavanz de la gestion de Aloch.

Se l'è de bona prospetives de portèr a compiment duta l'operazion - l'è stat dīt te Consei de Comun de Poza - enlouta paassa la speisa ence spener i 250.000 euro per i intervenc per tegnir avert chest invern e schivèr l dan de parbuda e de nonzech, ma i spener demò per sperlongèr la vita de Aloch de n an no serf a trop. Segur no l'è temp da perder e oramai l'è jà massa tèrt percheche l Comun posse se tor sù diretamente la gestion per chest invern: se vegn troà i scioldi ge volessa dut un che per chesta sajon

vae inant la Bufaure.

Ruèr a meter ensema 2 milions de euro sul teritorie l'è senester, soraldut dō che l'è jà stat fat la sotescrizion per la Termes, ma Aloch fà dalbon na gran emportanza turistica, promozionèla e ence sozietà, per duta la val.

Sun chest l'è a una ence l'APT: "chela che aon dedant coi mondèi juniores del 2019 l'è na gran ocajon per ruar tel circuit maor, se la lasciar sciampar fossa n gran dan per duta la val" disc l diretor Andrea Weiss. A el se jonta l Ski Team e n muion de jent e sportives fasscgn.

La speranza per duc l'è che Fascia s'è bona de desmostrèr de creer te la potenzialità de Aloch desche Zenter federèl del schi, che i imprenditores e i amministratori de val dae na man e che ence la Provincia entene che se trata de n investment strategich e la vegne encontra. De segur no l'è sorì, ma ge vel ge creer, e no perder temp.

Lucia Gross



L Ski Stadium de Poza l'è da egn zenter de arcedament per i schiadores de la squadra naziònela col projet "Piste azzurre" e lech de competizioni internaziònelas.